



御製律呂正義後編卷之一百八

樂章考 宴饗二

唐

宋



唐燕饗樂章

舊唐書樂志曰。高祖受禪。祖孝孫作大唐雅樂。按禮記大樂與天地同和。故制十二和之樂。圜丘以黃鐘爲宮。方澤以林鐘爲宮。宗廟以太簇爲宮。朝賀饗宴。則隨月用律爲宮。及孝孫卒。張文收更改釐定。大饗讌奏姑洗蕤賓二調。太宗六年。行幸慶善宮。宴從臣於渭水之濱。賦詩十韻。其宮卽太宗誕降之所。車駕臨幸。賞賜閭里。有同漢之宛沛焉。於是起居郎呂才以御製詩。被之管絃。名爲功成慶善樂之曲。冬至享燕。及國有大慶。與七德舞偕奏於庭。十四年。有景雲

見。河水清。張文收採古朱雁天馬之義。制景雲河清歌。名曰讌樂。爲諸樂之首。元會第一奏者是也。元宗善樂音。讌設醮會。御勤政樓。太常樂立部伎。坐部伎。依點鼓舞。間以胡夷之伎。日肝。卽內閑廐引蹠馬三十匹。歌傾杯樂曲。奮首鼓尾。縱橫應節。又施三層校牀。乘馬而上。抃轉如飛。又令宮女數百人。自帷出。擊雷鼓。爲破陣樂。太平樂。上元樂。每初年望夜。御勤政樓。觀燈作樂。較大醮御樓。更陳百戲。案此唐讌享樂之始末也。然樂不可極。欲不可從。王維凝碧詩之感慨。已於樓前百戲具陳之日而兆之矣。其樂章多不

傳者。不特祿山載樂器工人以去之故。蓋舊唐書樂志曰。太常舊相傳有宮商角徵羽讌樂五調歌詞各一卷。或云。貞觀中侍中楊仁恭妾趙方等所銓集。詞多鄭衛。皆近代詞人雜詩。至貞觀二十五年。太常卿韋縉又令太樂令孫元成更加整比。爲七卷。又自開元已來。歌者雜用胡夷里巷之曲。其孫元成所集者。工人多不能通。相傳爲法曲。今依前史舊例。錄雅樂歌詞。其五調法曲。詞多不經。不復載之。案五調法曲。卽所謂讌樂也。正史不載。故不傳。今亦不敢旁摭雜說。附會爲燕饗歌詞。蓋寧從其闕。恐違登錄雅樂之

例云。

宋燕饗樂章

唐後五代。曰梁唐晉漢周。梁制十二雅樂章。郊廟外。朝會迎送皇帝奏大同。羣臣行奏混同。其歌聲靡曼。胡鄭交奏。不足存。後唐並用唐樂。惟撰定廟室六曲。燕享樂仍唐之舊而已。後晉天福中正旦上壽登歌。其聲悲。大類薤露虞殯。聞者以爲不祥。則其樂章又何足紀。後漢張昭撰次郊祀宗廟朝會等曲甚備。然可紀者特宗廟七室樂歌。餘但記用樂。不記其曲。殆張昭所撰。未之或用也。周承四代後。樂器散失殆盡。

故文獻通考。謂其大祀郊廟用樂。餘不用樂。雖大周正樂記。崔悅言所造朝會十一曲。然亦無徵矣。此五代燕饗樂章所以不存也。所存自宋始。建隆乾德朝會樂章

宋太祖受命。詔太常竇儼定樂。改周十二順爲十二安。凡祭祀大朝會。則用太常雅樂。歲時宴饗。則用教坊諸部樂。夫姦聲亂色。不留聰明。淫樂慝禮。不接心術。教坊之設。唐之失也。宋初猶循舊制。置教坊四部。紹興乾道。遂不復置。今所錄蓋太常雅樂云。此朝會樂章。作於開國初太祖建隆乾德時。

正旦冬至朝會。皇帝升座。用隆安。公卿入門。用正安。上壽。用禧安。皇帝舉酒。初舉酒用白龜。再舉酒用甘露。三舉酒用紫芝。四舉酒用嘉禾。五舉酒用玉兔。羣臣酒行用正安。羣臣酒一行畢。作元德升聞。六變。酒再行畢。作天下大定。六變。凡二十八章。章八句。四章竇儼撰。二十四章陶穀等撰。

皇帝升座用隆安

天臨有赫。上法乾元。鏗鏘六樂。儼恪千官。皇儀允肅。五坐居尊。文明在御。禮備誠存。

公卿入門用正安

堯天協紀。舜日揚光。淑慎爾止。率由舊章。珮環濟濟。金石鏘鏘。威儀炳煥。至德昭彰。

上壽用禧安 二章

乾健為君。坤柔為臣。惟其臣子。克奉君親。永御皇極。以綏兆民。稱觴獻壽。山岳嶙峋。舜韶更奏。堯酒浮觴。皇情載懌。洪算無疆。基隆邾鄆。德茂陶唐。山巍日煥。地久天長。

皇帝初舉酒用白龜

聖德昭宣。神龜出焉。載白其色。或游于川。名符在沼。瑞應巢蓮。登歌丹陛。紀異靈篇。

再舉酒用甘露

天德冥應。仁澤載濡。其甘如醴。其凝如珠。雲表潛結。顯英允敷。降于竹帛。永昭瑞圖。

三舉酒用紫芝

煌煌茂英。不根而生。蒲茸奪色。銅池著名。晨敷表異。三秀分榮。書於瑞典。光我文明。

四舉酒用嘉禾

嘉彼合穎。致貢升平。異標南畝。瑞應西成。德至於地。皇祇效靈。和同之象。煥發祥經。

五舉酒用玉兔

盛德好生。網開三面。明視標奇。昌辰乃見。育質雪園。淪精月殿。著于樂章。色含江練。

羣臣酒行用正安

三章

戶牖嚴丹辰。鵷鸞造紫庭。懇祈南岳壽。勢拱北辰星。得士於茲盛。基邦固以寧。誠明一何至。金石與丹青。簪紱若雲屯。晨趨閭闔門。僉僉羅禹會。濟濟奉堯樽。周禮觀明備。天儀仰睟溫。高卑陳表著。同拱帝王尊。待漏造王遊。威儀盛莫京。紛綸簪組列。清遠珮環聲。禮飲終三爵。韶音畢九成。永同鳧藻樂。千載奉升平。

羣臣酒一行畢作元德升聞

二章

治定資神武。功成顯睿文。貢輸庭實旅。朝會羽儀分。偃
革千年運。垂衣萬乘君。孰知堯舜力。明德日升聞。
約法皇綱正。崇文寶歷昌。道人振木鐸。農器鑄干將。瑞
日含王字。卿雲藹帝鄉。萬邦成一統。鴻祚與天長。

六變 六章

宸辰威容盛。聲明禮樂宣。九州臻禹會。萬國戴堯天。貢
職輸琛賫。皇猷煥簡編。含和均暢茂。鳩慶結非煙。
朝會儼威儀。司常建九旗。舞容分綴兆。文物辨葳蕤。運
格桃林牧。祥開洛水龜。帝功潛日用。化俗自登熙。
螭階聊載筆。紀瑞軼唐虞。丹鳳儀金奏。黃龍負寶圖。羣

材薪棫樸。仁政煦蒲盧。蕩蕩巍巍德。豚魚信自孚。
接聖宅神都。方來五達區。國賢熙帝載。靈命握乾符。至
化當純被。斯文益誕敷。車書今混一。聖治奉三無。
聖王臨大寶。八表奏才賢。經緯文天賦。剛柔德日宣。建
邦隆柱石。造物運陶甄。共致昇平業。綿長保億年。
神化妙無方。巍巍通百王。鶴書搜隱逸。龍陛策賢良。拱
揖朝羣后。賓筵闢四方。洪圖基億載。淳耀德彌光。

酒再行畢作天下大定 二章

皇猷敷八表。武誼肅三邊。蘭綺韜兵日。靈臺偃伯年。奉
珍皆述職。削衽盡朝天。功德超前古。音徽播管絃。

伐叛天威震。恢疆帝業多。削平倅肅殺。涵煦極陽和。蹈厲觀周舞。風雲入漢歌。功成推大定。歸馬偃珂戈。

六變 六章

惕厲日乾乾。潛蟠或躍淵。伐謀參上策。受鉞總中堅。田訟歸周日。民謠戴舜年。風雲自冥感。嘉會翼飛天。壺關方逆命。投袂起親征。虎旅聊攻伐。梟巢遽蕩平。天威清朔漠。仁澤被黎氓。按節皇輿復。洋洋載頌聲。蠢茲淮海帥。保據毒黎苗。不悟龍興漢。猶同犬吠堯。六師方雨施。孤壘自冰消。千載逢嘉運。華夷奉聖朝。上游荆楚要。澤國洞庭深。自識同文世。皆迴拱極心。一

戎聊杖鉞。九土盡輸金。大定功成後。薰風入舜琴。席卷定巴印。西遐盡率從。岷嶓難負阻。江漢自朝宗。述職方舟集。驅車九折通。粲然書國史。冠古耀豐功。銳旅慶回旋。邊防盡晏然。建橐方偃武。飛將亦韜弦。震曜資平壘。文明協麗天。泚泚成大業。赫奕在青編。

淳化中朝會樂章

按宋太宗有太平興國雍熙端拱淳化至道六年號。此為淳化時朝會樂章。上壽用和安。皇帝舉酒。初舉酒用祥麟。再舉酒用丹鳳。三舉酒用河清。四舉酒用白龜。五舉酒用瑞麥。羣臣酒一行畢作化

成天下。六變。酒再行畢。作威加海內。六變。凡二十
三章。章八句。翰林學士蘓易簡等撰。

上壽用和安 二章

四序伊始。三陽肇開。條風入律。玉管飛灰。望雲肅謁。鳴
佩斯來。稱觴獻壽。瞻拱星迴。

一陽應候。萬國同文。天正紀節。太史書雲。凝旒在御。列
敘爰分。壽觴斯薦。祝慶明君。

皇帝初舉酒用祥麟

聖皇御宇。仁獸誕彰。在郊旅貢。游時呈祥。星辰是稟。草
木無傷。紀異信史。登歌太常。

再舉酒用丹鳳

九苞薦瑞。戴德膺仁。滌翰爰奮。靈音載振。非時不見。有
道則臻。降岐匪匹。儀舞為隣。

三舉酒用河清

沔彼涇瀆。澄明鑑如。清應寶運。光涵帝居。洞分沈璧。徹
見游魚。聖祚無極。神休偉與。

四舉酒用白龜

稽彼靈物。允昭聖皇。浮石可躍。巢蓮益方。金方正色。介
族殊祥。信書永耀。帝德無疆。

五舉酒用瑞麥

芄芄嘉麥。擢秀分岐。甘露夕洒。惠風晨吹。良農告瑞。循吏稱奇。歸美英主。折而貢之。

羣臣酒一行畢作化成天下 二章

案化成天下。通考作以威天下。下有威加海內。曲宜從正史作化成。

軒昊方同德。成康粗比肩。素風惟普暢。皇道本無偏。陰魄重輪滿。陽精五色圓。要荒咸率服。卓越聖功全。聖德比陶唐。千年祚運昌。茂功雖不宰。鴻業自無疆。極塞承清謐。齊民益阜康。文明同日月。遐邇仰輝光。

六變 六章

蕩蕩無私世。巍巍至聖君。山河分國寶。日月耀人文。厭浥凝甘露。輪困吐慶雲。正聲兼大雅。洋溢應南薰。鴻範合彝倫。調元四序均。歲功天吏正。御苑物華新。底貢陳方物。來賓列遠人。奉觴呈九奏。嘉貺動穹旻。大君隆至化。與運契千齡。覲禮俄班瑞。夷賓盡實庭。成文調露樂。奉聖拱辰星。舞佾方更進。朝陽上楚萍。禮樂昭王業。寰區致太平。革車停北狩。雲稼屢西成。國有詳延詔。鄉聞誦誦聲。日華融五色。遐邇仰文明。亭障戢干戈。人心浹太和。務農登寶穀。獵俊設雲羅。儀鳳書良史。祥麟載雅歌。嘉晨資宴喜。星拱弁峩峩。

冠古耀鴻徽。深仁及隱微。二南江漢詠。九奏鳳凰飛。設虞羅鐘律。盈庭列舞衣。文明資厚德。怡懌兆民歸。

酒再行畢作威加海內二章

革輅征汾晉。隳城比燎毛。桓桓勗軍旅。將將禦英豪。神武誠無敵。天威詎可逃。王師宣利澤。霈若沃春膏。振萬方明德。疾徐咸可觀。鏗鏘動金奏。蹈厲總朱干。夾進昭威武。申嚴警晏安。守方推猛士。當用鷁爲冠。

六變六章

宣榭始觀兵。桓桓稱鼓行。一戎期大定。載纘議徂征。善政從師律。神功冀武成。勗哉勤誓衆。王業自經營。

聲教方柔遠。甌閩禮可招。獻圖連日際。歸國象江潮。撫運重熙盛。提封萬里遙。還同有虞氏。文德格三苗。南暨宣皇化。東吳奉乃神。舞干方耀德。執玉自來賓。巢伯朝丹陛。韓侯覲紫宸。古今歸一揆。懷遠道彌新。遺俗續陶唐。來蘓徯聖皇。布昭湯弔伐。恢復漢封疆。金鉞申戡剪。朱干示發揚。宜哉七德頌。千載播洋洋。乃眷嘗西顧。偏師暫首征。靈旗方直指。獷俗自亡精。禹叙終馴致。堯封漸化成。不須嚴尉候。於廓海彌清。干戚有司傳。威容著凱旋。衆成王業盛。役輟武功全。兵寢西郊閱。書惟北闕縣。聖神膺景命。卜世萬斯年。

景德中朝會樂章

千載按景德。係真宗年號。真宗有成平景德天禧大中
祥符乾興六年號。此朝會樂章。乃景德中作。皇帝
升座用隆安。公卿入門用正安。上壽用和安。皇帝
舉酒。初舉酒用祥麟。再舉酒用丹鳳。三舉酒用河
清。羣臣酒行用正安。酒一行畢作盛德升聞。酒再
行畢作天下大定。降座用隆安。凡十四章。章八句。
晁迥等分撰。

皇帝升座用隆安

金奏在庭。羣后在位。天威煌煌。嚮明負宸。高拱穆清。弁

冕端委。盛德日新。禮容有煒。

公卿入門用正安

萬邦來同。九賓在位。奉璋薦紳。陟降庭止。文思安安。威
儀棣棣。臣哉隣哉。介爾蕃祉。

上壽用和安

天威煌煌。山龍采章。庭實旅百。上公奉觴。拱揖羣后。端
委垂裳。永錫難老。萬壽無疆。

皇帝初舉酒用祥麟

帝圖會昌。二獸效祥。雙角共觚。示武不傷。四靈爲畜。元
枵耀芒。公族信厚。元元阜康。

再舉酒用丹鳳

矯矯長離。振羽來儀。和音中律。蒸翰揚輝。珍符沓至。品物攸宜。至德元感。受天之祺。

三舉酒用河清

德水湯湯。發原靈長。皎鑒澄徹。千年效祥。積厚流濕。資生阜昌。朝宗潤下。善利無疆。

羣臣酒行用正安

三章

思皇多士。靖恭者位。鳴玉飛綬。鏘鏘濟濟。宴有折俎。以示慈惠。罔敢不祗。福祿來暨。

金奏在庭。有酒斯旨。顒顒印印。嚮明負辰。湛湛露斯。式宴以喜。佩玉藻兮。罔不由禮。酒以成禮。樂以侑食。露湛朝陽。星環紫極。淑慎爾容。既飽以德。進退周旋。威儀抑抑。

羣臣酒一行畢作盛德升聞

二章

八佾具呈。萬舞有奕。既以象功。又以觀德。進旅退旅。執籥秉翟。至化懷柔。遠人來格。

闐闐天開。羣后在位。設業設虞。庭燎晰晰。斧展當陽。虎賁夾陛。舞之蹈之。四隩來暨。

酒再行畢作天下大定

二章

武功既成。綴兆有翼。以節八音。以象七德。俟俟蹲蹲。朱

千玉戚。發揚蹈厲。其儀不忒。
偃伯靈臺。功成作樂。以昭德容。以清戎索。萬邦會同。邪
慝銷鑠。盡善盡美。侔彼韶箏。

降座用隆安

被袞當陽。穆穆皇皇。擊石拊石。頌聲揚揚。和樂優洽。終
焉允臧。禮成而退。荷天百祥。

大中祥符朝會樂章

按真宗景德中。已有朝會樂十四章。此復作於大
中祥符時者。蓋餘俱從舊。惟皇帝舉酒五盞樂歌。
有更定耳。皇帝舉酒。初舉酒用醴泉。再舉酒用神

芝。三舉酒用慶雲。四舉酒用靈鶴。五舉酒用瑞木。
凡五章。章八句。李宗諤等分撰。

皇帝初舉酒用醴泉

感沸檻泉。寒流清泚。地不愛寶。其旨如醴。上善至柔。嘉
休所啟。利澤無疆。允資岱禮。

再舉酒用神芝

彼茁者芝。茂英煌煌。敷秀喬嶽。實繁其房。適符修貢。封
巒允臧。永言登薦。抑惟舊章。

三舉酒用慶雲

惟帝佑德。卿雲發祥。紛紛郁郁。五色成章。捧日逾麗。回

風載翔。歌薦郊廟。播厥無疆。

四舉酒用靈鶴

元文申錫。嘉祥紹至。偉茲胎禽。羽族之異。翻翰來儀。徘徊嘹唳。祚聖儲休。聿昭天意。

五舉酒用瑞木

天生五材。木曰曲直。維帝順天。厚其生植。連理效祥。成文表德。總萃坤珍。永光秘刻。

熙寧中朝會樂章

案神宗有熙寧元豐兩年號。此樂章係熙寧時作。皇帝初舉酒用慶雲。再舉酒用嘉禾。三舉酒用靈

芝。凡三章。章八句。撰者未詳。

初舉酒用慶雲

乾坤順夷。皇有嘉德。爰施慶雲。承日五色。輪囷下乘。萬物皆飾。惟天祚休。長被無極。

再舉酒用嘉禾

彼美嘉禾。一莖九穗。農疇告祥。史牒書瑞。擊壤歡呼。如京委積。留獻春種。昭錫善類。

三舉酒用靈芝

皇仁溥博。品物蕃滋。慶祥回復。秀發神芝。靈華雙舉。連業四施。披圖按牒。永享純禧。

又朝會樂章

按此樂章。宋史樂志不言作於何時。而上熙寧朝會樂。題云六首。所載止三首。此則題云酒會三首。或三字誤六字。朝字誤酒字。亦未可定。若六字非誤。則此亦熙寧中更定也。初舉酒用靈芝。再舉酒用壽星。三舉酒用甘露。凡三章。章八句。撰者未詳。初舉酒用靈芝。嘉瑞降臨。應我皇德。燐燐神芝。不根而植。春秋三秀。晝夜一色。物播詩歌。聲被金石。再舉酒用壽星。

倬彼星象。於昭于天。維南有極。離丙之躔。既明且大。應聖乘乾。誕受景福。億萬斯年。

三舉酒用甘露

泣泣零露。雲英醴溢。和氣凝津。流甘委白。飴泛泮林。珠聯竹柏。天不愛道。聖功允格。

哲宗朝會樂章

哲宗受傳國寶。命官改製樂章。凡三章。大朝會上壽用之。其一永昌。其二神光。其三翔鶴。各一章。章

八句。

其一永昌

於穆我王。繼序不忘。明昭上帝。上帝是皇。長發其祥。惠我無疆。受命於天。既壽永昌。

其二神光

惟皇上德。伊嘏我王。將受厥明。載錫之光。於昭於天。曄曄煌煌。緝熙欽止。其永無疆。

其三翔鶴

彼鳴在陰。亦白其羽。聲聞於天。來集斯所。勉勉我王。咸遂厥宇。播於異物。受天多祜。

紹興朝會樂章

按高宗南渡。有建炎紹興兩年號。紹興十五年。正

旦朝會。以羣臣固請歸尊慈極。始用樂。皇帝升座。用乾安。公卿入門用正安。升降同。上公上壽用和安。皇帝初舉酒用瑞木成文。再舉酒用滄海澄清。二舉酒用瑞粟呈祥。羣臣酒行用正安。酒一行文舞。酒載行武舞。皇帝降座用乾安。凡十三章。章八句。

皇帝升座用乾安

鈞陳肅列。金奏充庭。顛卬南面。如日之升。垂衣拱手。治無能名。順履獻歲。大安大榮。

公卿入門用正安 升降同

天子當陽。臣工率職。流水朝宗。衆星拱極。環佩鏘鏘。威儀抑抑。上下交欣。同心同德。

上公上壽用和安

八音克諧。萬舞有奕。上公奉觴。率茲百辟。聲効呼嵩。祝聖人壽。億載萬年。天長地久。

皇帝初舉酒用瑞木成文

厚地效珍。嘉木紀瑞。匪刻匪雕。具文見意。三登太平。允協聖治。詩雅詠歌。有光旣醉。

再舉酒用滄海澄清

百谷王符。聖治不揚。波效殊祉。德淪淵滄。海清應千秋。

敘五行。

三舉酒用瑞粟呈祥

至治發聞。惟馨香。播厥百穀。臻穰穰。農夫之慶。歲其有禾。易長畝盈。倉箱時和。物阜粟滋。茂嘉生駢穗。來呈祥。自今以始。大豐美。行旅不用齋餼糧。

羣臣酒行用正安 二章

羣公卿士。咸造在庭。式燕以衍。恩均露零。穆穆明明。於斯爲盛。歸美報上。一人有慶。

明明天子。萬福來同。嘉賓式燕。曷不肅雍。燕以示慈。式禮莫愆。樂胥君子。容止可觀。

酒一行文舞 二章

帝德誕敷。銷鑠羣慝。近悅遠來。惟聖時克。玉振金聲。治功興起。韶箛象之。盡善盡美。文物以紀。藻色以明。禮備樂舉。適觀厥成。睿知有臨。誕敷文德。教雨化風。洽此四國。

酒載行武舞 二章

用戒不虞。誰能去兵。師出以律。動必有名。折彼遐衝。布昭聖武。和衆安民。時惟多助。止戈曰武。惟聖爲能。御得其道。無敢不庭。整我六師。稽諸士德。不吳不揚。有嚴有翼。

皇帝降座用乾安

帝座熒煌。庭紳肅穆。對揚天休。各忝爾服。頌聲洋洋。彌文郁郁。禮備樂成。永膺多福。

建隆御樓樂章

此爲南郊回仗而作也。案唐故事。天子日御殿見羣臣。日常參。朔望薦食。諸陵寢。有思慕之心。不能臨前殿。則御便殿。見羣臣。日入閣。宣政。前殿也。謂之衙。衙有仗。紫宸。便殿也。謂之閣。其不御前殿而御紫宸也。乃自正衙喚仗。由閣門而入。閣官俟朝於衙者。因隨以入見。故謂之入閣。葉石林曰。唐正

衙日見羣臣。百官皆在。謂之常參。喚仗入閣。百官亦隨以入。則唐制天子未嘗不日見百官也。其後不御正衙。紫宸所見。惟大臣及內諸司。百官俟朝於正衙者。傳聞不坐。即退。則百官無復見天子矣。敬宗再舉入閣禮之後。百官復存朔望兩朝。至五代又廢。故後唐明宗始詔羣臣每五日一隨宰相入見中興便殿。爲起居朔望。天子一出御文明殿爲入閣。訖宋朝不改。元豐官制行。始詔侍從官而上。日朝垂拱。謂之常參官。百司朝官以上。每五日一朝紫宸。爲六參官。在京朝官以上。朔望一朝紫宸。爲朝參官。案此云御樓。殆因郊祀大典。回仗至樓。比常參六參朝參爲更重大。故特著樂章云。宋史樂志。即次於朝會之後。今亦從之。建隆太祖時也。南郊回仗。駕至樓前。用采茨。升座用隆安。降座用隆安。凡三章。章八句。翰林學士竇儼撰。駕至樓前。用采茨。

高烟升太一。明祀達乾坤。天仗回嶢闕。皇輿入應門。簪裳如霧集。車騎若雲屯。兆庶皆翹首。巍巍萬乘尊。

升座用隆安

禮祀畢圓丘。嘉辰慶澤流。天儀臨觀魏。盛禮藹風猷。洋

溢歡聲動。氤氳瑞氣浮。上穹垂眷佑。邦國擁鴻休。

降座用隆安

華纓在列。左衽來王。帝儀炳煥。大樂鏗鏘。禮成曉闕。言旋未央。一人有慶。萬壽無疆。

咸平御樓樂章

此亦南郊回仗而作。案咸平。真宗年號也。車駕至樓前用采茨。索扇用隆安。升座用隆安。降座用隆安。凡四章。章八句。知制誥楊億撰。

駕至樓前用采茨

禮成於郊。迎日之至。時乘六龍。天旋象魏。端門九重。虎

賁萬騎。四夷來王。羣后輯瑞。

索扇用隆安

應門有翼。羽衛斯陳。山龍袞冕。律度聲身。峩峩奉璋。肅肅九賓。清明在躬。志氣如神。

升座用隆安

園丘類上帝。六變降天神。禋燔禮云畢。仗衛肅以陳。天顏瞻咫尺。王澤熙陽春。玉帛臻禹會。動植霑堯仁。

降座用隆安

肆眚云畢。淳熙溥將。雷雨麗澤。雲物效祥。禮容濟濟。天威皇皇。大賚四海。富壽無疆。

咸平御樓樂章

此藉田回仗御樓而作也。車駕至樓前用采茨升座用隆安。凡二章。章八句。宋白等撰。

駕至樓前用采茨

農皇既祀禮畢躬耕。商輅旋軫。周頌騰聲。觀魏將陟。服御爰更。輿人瞻仰。如日之明。

升座用隆安

應門斯御。雉扇爰開。人瞻日月。澤動雲雷。同風三代。均禧九垓。歡心允洽。時詠康哉。

乾興御樓樂章

此不知何事回仗。案其樂章云。夾鐘紀月。殆二月。藉田回仗歟。又云。眚災流慶。卽以爲御樓肆赦也。亦可。乾興亦真宗時也。文獻通考云。乾興元年御樓。升座用隆安。降座用隆安。凡二章。章八句。李維等撰。

升座用隆安

夾鐘紀月。初吉在辰。眚災流慶。有德惟仁。采章震耀。典禮具陳。茂昭丕貺。永庇斯民。

降座用隆安

皇衢赫敞。黼座穹崇。華纓在列。嚴令發中。王制鉅麗。寶

瑞豐融。均禧綿寓。萬壽無窮。

紹興登門肆赦樂章

按通典曰。天子之門有五。最外曰臯門。二曰庫門。三曰雉門。四曰應門。五曰路門。路門之內。則路寢也。臯門之內曰外朝。朝有三槐。左右九棘。近庫門有三府九寺。庫門之內。有宗廟社稷。雉門之外。有兩觀。連門觀。外有詢事之朝。在宗廟社稷之間。雉門內有百官宿衛之廨。應門內曰中朝。中朝有九卿之室。則九卿理事之處。朝則入而理事。夕則歸於庫門外。外朝之法。朝有疑獄。王集而聽之。燕朝

者。路寢之朝。羣公以下。常日於此朝見君也。此曰登門。殆猶外朝詢事之遺制歟。案通考馬氏曰。近代以來。天子親郊。其禮文繁。其儀衛盛。其賞賚厚。故必三歲始能行之。又案蘇軾曰。郊而肆赦。非周禮也。然推天地生物之心。而及肆赦。非禮之中。猶為禮焉。紹興登門肆赦。蓋在南郊後也。故其樂章曰。拜祝於郊。云。升座用乾安。凡二章。章八句。升座用乾安。

拜祝於郊。皇哉唐哉。熙事休成。六駢鼎來。天闔以決。地垠以開。隕祉發祥。如登春臺。

降座用乾安

鴻霈普洽。言歸端門。蕩蕩巍巍。旋乾轉坤。穆姓宣室。儲思垂恩。於萬斯年。敷錫羣元。

寧宗登門肆赦樂章

此亦郊而肆赦也。升座用乾安。降座用乾安。凡二章。章八句。

升座用乾安

帝饗於郊。荷天之休。五福敷錫。皇明燭幽。雲行雨施。仁翔德遊。聖人多男。歌頌九州。

降座用乾安

天日清晏。朝野靖安。三靈答祉。萬國騰懽。帝命不違。王業艱難。天子萬年。永迪監觀。

皇太后朝會樂章

母后臨朝。非禮也。宋仁宗卽位。迨劉太后崩。上始親政。宋史樂志載明道元年章獻明肅皇太后朝會樂章。示戒也。雖漢唐嘗有之。然孔道輔有言曰。人臣當引君堯舜。豈直引漢唐爲法耶。其樂章。皇太后升座用聖安。公卿入門用禮安。皇帝上壽酒用崇安。上壽用福安。皇太后初舉酒用玉芝。再舉酒用壽星。三舉酒用奇木連理。羣臣酒行用禮安。

酒一行畢。作厚德無疆之舞。酒再行畢。作四海會同之舞。降座用聖安。凡十五章。章八句。

皇太后升座用聖安

聖母有子。重光類禋。聖皇事母。感極天人。百辟在庭。九儀具陳。禮容之盛。萬國咸賓。

公卿入門用禮安

帝率四海。承顏盡恭。端闈肅設。羣后來同。玉佩鏘鳴。衣冠有容。英韶節步。磬管雍雍。

皇帝上壽酒用崇安

天子之德。形於四方。尊親立愛。化洽風揚。聖母禕衣。明

君黼裳。因時獻壽。克盛朝章。

上壽用福安

盛禮煌煌。六衣有光。千官在位。百福稱觴。乾德慈仁。邦斯淑祥。如山之壽。佑聖無疆。

皇太后初舉酒用玉芝

燐燐靈芝。生於殿闈。照映華拱。紛敷玉蕤。感召元和。光符聖期。祥篇協吉。百福咸宜。

再舉酒用壽星

現彼南極。昭然瑞文。騰光西位。薦壽中宸。太史駢奏。升歌有聞。軒宮就養。億萬斯春。

三舉酒用奇木連理

王化無外。坤珍效靈。旁枝內附。直榦來并。羣分非一。祺祥紹登。至誠攸感。海縣斯寧。

羣臣酒行用禮安

肅肅臨下。有威有容。循循事上。惟信惟忠。盛禮興樂。示慈訓恭。君臣協吉。惟道之從。湛湛承露。晞於載陽。我有旨酒。羣臣樂康。既飲以德。亦圖爾良。永言修輔。用協天常。禮均孝慈。樂合韶武。至德光矣。鴻恩亦溥。上下和濟。華夷樂湑。醴罍三行。盛儀斯舉。

酒一行畢作厚德無疆之舞

堯母之聖。放勛為子。同心協謀。柔遠能邇。以德康俗。以文興治。斯焉象功。罔不昭濟。至矣坤元。道符惟聖。就養宸極。取隆善政。翟籥紛舉。笙鏞協應。翺翔有容。表德之盛。

酒再行畢作四海會同之舞

七德之舞。四朝用康。有如姬妣。助集周邦。威克厥愛。居安不忘。風旋山立。濟濟皇皇。左秉朱干。右揮玉戚。以象武綴。以明皇德。天子榮養。羣臣述職。四夷賓附。罔不承式。

降座用聖安

長樂居尊。盛容有煒。文王事親。萬國歸美。朝會之則。邦家之紀。受福于天。克昭隆禮。

皇帝上尊號樂章

按通考王禮序曰。秦漢而後。因革不同。有古無而。今有者。如聖節上壽。上尊號拜表之類是也。夫堯曰放勳。舜曰重華。皆史臣贊堯頌舜之詞。後世遂以爲堯舜號。而美號冠萬世而莫及。況蕩蕩莫能名。豈數字數十字所能盡。倘其能盡。則德亦小矣。故聖主令辟。每有却尊號而弗受者。其度量不深。入門用正安。一章。章八句。

冊寶入門用正安

於穆元后。天臨紫宸。飛綏星拱。建羽林芬。徽冊是奉。鴻名愈親。荷茲介祉。永永無垠。

治平皇太后皇后冊寶樂章

按坊記曰。善則稱親。上皇太后冊寶。殆此意也。昏義曰。天子理陽道。后治陰德。天子聽外治。后聽內職。教順成俗。外內和順。國家理治。皇后冊寶。匡衡

所謂匹配之際。生民之始。萬福之原也。治平。英宗年號。其冊寶樂章。皇帝升座用乾安。太尉等奉冊寶入門用正安。皇帝降座用乾安。凡三章。章八句。皇帝升座用乾安。

王化之始。治繇內孚。時庸作命。玉簡金書。磬筦在庭。其縱繹如。天臨法展。禮與誠俱。

太尉等奉冊寶入門用正安

辟儀臨拱。丕命明敷。鸞回寶勢。鴻貫瑤光。禮成樂備。德裕名芳。肇基王化。永懋天祥。

皇帝降座用乾安

衮衣繡裳。嚴威肅莊。八音具張。龔虞龍驤。玉簡瑤章。金書煌煌。壽千萬年。與天比長。

熙寧皇太后冊寶樂章

按熙寧。宋神宗年號。神宗。係英宗子。皇太后。英宗后也。後哲宗即位。英宗高后臨朝。召故臣。罷新法。絕私恩。人稱之為女中堯舜。此樂章。殆即為宣仁后作也。出入用正安。升座用乾安。降座用乾安。凡三章。章八句。出入用正安。

煌煌鳳字。正氣宛延。天門嘯吻。飛驂後先。龍龔四合。奏

御製律呂正聲 編 卷五
鼓淵淵。母儀天下。何千萬年。

升座用乾安

峩峩繡展。旋佩以登。如彼杲日。凌天而升。玉色下照。亶
亶繩繩。猗歟大孝。四海其承。

降座用乾安

皇帝降席。流雲四開。堯趨舜步。下躡天階。恭授寶冊。翠
旄裴回。明明純孝。鴻釐大來。

哲宗上太皇太后冊寶樂章

按宣仁后。於神宗為皇太后。於哲宗為太皇太后。
其上冊寶樂章。皇帝升座用乾安。降座用乾安。太

皇太后升座用乾安。降座用乾安。太尉等奉冊寶

出入門用正安。凡五章。章八句。

皇帝升座用乾安

大矣。孝熙帥民以躬。奉承寶冊。欽明兩宮。萬樂具舉。一
人肅雍。化繇上始。四海來同。

降座用乾安

皇帝仁孝。總臨萬方。褒顯其親。日嚴以莊。龍袞翼翼。玉
書煌煌。傳之億世。休有烈光。

太皇太后升座用乾安

總裁庶政。擁佑嗣皇。金書玉簡。爛其文章。衆歌警作。筦

磬將將。保安四極。降福無疆。

降座用乾安

塗山之德。渭涘之祥。圖徽寶冊。玉色金相。管弦燧煜。鐘鼓嗶嗶。天之所啟。既壽而昌。

太尉等奉冊寶出入門用正安

玉車臨御。鳳蓋琴麗。奉承冊寶。彌文盛儀。抗聲極律。助我孝熙。天之所佑。萬壽無期。

紹興十一年發皇太后冊寶樂章

按紹興高宗年號初封康王奉孟太后詔卽位於應天此云皇太后始徽宗孟后歟抑高宗係徽宗

第九子。母以子貴。故發皇太后冊寶亦未可定。其冊寶樂章。皇帝隨冊寶降殿用聖安。中書令奉冊詣皇帝褥位用禮安。侍中奉寶詣皇帝褥位用禮安。太傅奉冊寶出門用聖安。太傅奉冊寶入門用聖安。太傅奉冊授提點官用禮安。太傅奉寶授提點官用禮安。冊寶升慈寧殿幄用聖安。凡八章。章八句。

皇帝隨冊寶降殿用聖安

景祚有開。符天媿昊。誕毓聖神。是崇位號。星拱天隨。祇嚴冊寶。還御慈寧。增光舜道。

中書令奉冊詣皇帝褥位用禮安

聲樂備陳。禮容罔忒。相維辟公。虔奉玉冊。皇則受之。慕形於色。既壽且康。與天無極。

侍中奉寶詣皇帝褥位用禮安

祖啟瑤光。誕生明聖。尊極母儀。帝康作命。寶章煌煌。導以笙磬。還燕慈寧。邦家後慶。

太傅奉冊寶出門用聖安

肅肅東朝。帝隆孝治。猗歟丕稱。寶冊斯備。皇扉四闢。導迎慶瑞。德邁大任。有周卜世。

太傅奉冊寶入門用聖安

靜順坤儀。聖神是育。懿鑠昭陳。鏤文華玉。樂奏既備。禮儀不瀆。導迎善祥。翟車歸翠。

太傅奉冊授提點官用禮安

孝奉天儀。信維休德。發越徽音。禮文靡忒。永保嘉祥。時萬時億。歸於東朝。含飴燕息。

太傅奉寶授提點官用禮安

肅雍長樂。克篤其慶。河洲茂德。沙麓啟聖。是生睿哲。蚤隆丕運。欽稱鴻寶。永膺天命。

冊寶升慈寧殿幄用聖安

禮行東朝。樂奏大呂。羽衛森陳。簪紳式序。雲幄邃嚴。宏

典是舉。天子萬年。母儀寰宇。

乾道七年恭上太上皇帝太上皇后尊號樂章

按乾道。孝宗年號。高宗無子。婁寅亮以太祖造宋。能公天下。而子孫不及享為言。因以太祖六世孫秀王鏐之子脊為皇太子。上遜位皇太子脊。自稱太上皇。曰。付託得人。吾無憾矣。此所云太上皇帝與太上皇后。蓋即高宗與高宗之后也。冊寶降殿用正安。中書令侍中奉冊寶詣殿下用正安。皇帝奉太上皇帝冊寶授太傅用禮安。奉太上皇后同。冊寶出門用正安。冊寶入德壽宮門用正安。太上

皇帝升御座。降同。太傅奉太上皇帝冊寶升殿用聖安。太傅奉太上皇后冊寶升殿用聖安。皇帝從太上皇后冊寶詣宮中用正安。太上皇后出閣升御座用坤安。降同。內侍官舉太上皇后冊詣讀冊位用聖安。凡十有一章。章八句。

冊寶降殿用正安

元祀介福。孰綏孰將。歸于尊親。孝哉君王。載鏤斯牒。載琢斯章。得名得壽。如虞如唐。

中書令侍中奉冊寶詣殿下用正安

宗郊斯成。交舉典冊。汝輔汝弼。威儀是力。陳于廣庭。迨

御製律呂正統編 卷五
此上日。魏魏煌煌。烏覩在昔。

皇帝奉太上皇帝冊寶授太傅用禮安 奉太上皇

后同

儀物陳矣。禮樂明矣。天子戾止。詒爾臣矣。陟降維則。恭且勤矣。茫茫四海。德教形矣。

冊寶出門用正安

天門九重。蕩蕩開徹。金支秀華。垂紳佩玦。或導或陪。率履不越。注民耳目。四表胥悅。

冊寶入德壽宮門用正安

禮神頌祇。福祿來下。不有榮名。孰緝伊嘏。千乘萬騎。魚

魚雅雅。皇扉洞開。鞠躬如也。

太上皇帝升御座 降同

按此一章。史闕曲名。

穆穆聖顏。安安天步。有禘者儀。以莫不舉。天人和同。恩澤洋洋。普億載萬年。為眾父父。

太傅奉太上皇帝冊寶升殿用聖安

大哉堯乎。南嚮垂裳。君哉舜也。拜而奉觴。縑藉光華。鼓鐘鏗鏘。三事稽首。宋德無疆。

太傅奉太上皇后冊寶升殿用聖安

乾元資始。坤元資生。允也聖德。同實異名。春王三朝。典

冊並行。咨爾上公。相儀以登。

皇帝從太上皇后冊寶詣宮中用正安

維冊伊何。鏤玉垂鴻。維寶伊何。範金鈕龍。翊以贊御。間以笙鏞。誰敢不恭。天子實從。

太上皇后出閣升御座用坤安 降同

帝膺永福。功靡專有。既尊聖父。亦燕壽母。怡怡在宮。大典時受。彤管紀之。天長地久。

內侍官舉太上皇后冊詣讀冊位用聖安

斂福於郊。逢時之泰。揭名日月。侔德覆載。自我作古。域中有大。永言保之。眉壽無害。

淳熙二年發太上皇帝太上皇后冊寶樂章

按淳熙亦孝宗年號。乾道七年。上尊號冊寶。淳熙

二年。又加上也。冊寶降殿用正安。中書令侍中奉

冊寶詣殿下用正安。皇帝奉太上皇帝冊寶授太

傅用禮安。奉太上皇后同。冊寶出門用正安。冊寶

入德壽宮門用正安。太上皇帝升御座用乾安。降

同。太傅奉太上皇帝冊升殿用聖安。奉寶同。太傅

奉太上皇后冊寶升殿用聖安。皇帝從太上皇后

冊寶詣宮中用正安。太上皇后出閣升御座用坤

安。降同。內侍官舉太上皇后冊詣讀冊位用聖安。

舉寶同。凡十有一章。章八句。

冊寶降殿用正安

高明者乾。博厚者坤。以清以寧。資始資生。壽胡可度。德胡可評。願言從欲。誕受強名。

中書令侍中奉冊寶詣殿下用正安

受命既長。福祿既康。如日之升。如月之常。追琢其章。金玉其相。君子萬年。保其家邦。

皇帝奉太上皇帝冊寶授太傅用禮安 奉太上皇

后同

翠華之旗。靈鼉之鼓。陳於廣宇。相我盛舉。來汝公傅。肅

乃儀矩。毋愆於素。以篤多祜。

冊寶出門用正安

蚺鰐青龍。婉孌象輿。其載伊何。煌煌金書。乃由端門。乃行康衢。于以榮親。振古所無。

冊寶入德壽宮門用正安

惟天為大。其德曰誠。惟堯則之。其性曰仁。迺文迺武。得壽得名。於萬斯年。以莫不增。

太上皇帝升御座用乾安 降同

天行惟健。天步惟安。聖子中立。臣工四環。民無能名。威不違顏。宋德宜頌。漢儀可刪。

太傅奉太上皇帝冊升殿用聖安

奉寶同

天畀遐福。允彰父慈。維昔曠典。我能舉之。徐爾陟降。敬爾威儀。申錫無疆。永言保之。

太傅奉太上皇后冊寶升殿用聖安

乾健坤從。陽剛陰相。迨茲受祉。允也並況。虞業在下。儀物在上。咨時三公。執事無曠。

皇帝從太上皇后冊寶詣宮中用正安

丕顯文王之德之純。亦有太姒。式揚徽音。維冊維寶。迺玉迺金。伊誰從之。一人事親。

太上皇后出閣升御座用坤安

降同

重翟出房。禕衣被躬。委委佗佗。河潤山容。聖皇臨軒。聖母在宮。並受鴻名。與天無窮。

內侍官舉太上皇后冊詣讀冊位用聖安

舉寶同

珉玉玢幽。裹蹄精良。既刻厥文。亦鑄之章。象德維何。至靜而方。輔我光堯。萬壽無疆。

淳熙十二年加上太上皇帝太上皇后尊號樂章

按孝宗乾道七年。上太上皇帝太上皇后尊號。淳

熙二年又上。此淳熙十二年又上。蓋高宗尊號。凡

三上焉。大慶殿發冊寶降殿用正安。中書令侍中

奉太上皇帝太上皇后冊寶詣殿下用正安。皇帝

奉太上皇帝冊寶授太傅。太上皇后冊寶同。冊寶出門用正安。德壽宮冊寶入殿門用正安。太上皇帝出宮升御座用乾安。降座同。太傅中書令侍中奉太上皇帝冊寶升殿用聖安。太傅中書令侍中奉太上皇后冊寶升殿用聖安。皇帝從太上皇后冊寶詣宮中用正安。太上皇后出閣升御座用坤安。降座同。內侍舉太上皇后冊寶詣讀冊寶位用聖安。凡十有一章。章八句。

大慶殿發冊寶降殿用正安

維天蓋高。維地克承。父尊母親。天地難名。強名廣代。建

號安榮。衍登壽嘏。闡繹皇明。

中書令侍中奉太上皇帝冊寶太上皇后冊寶詣殿下用正安

二儀同尊。兩曜齊光。巍巍煌煌。不顯亦彰。實茂號榮。玉振金相。於萬斯年。既壽且昌。

皇帝奉太上皇帝冊寶授太傅 太上皇后冊寶同

案史闕曲名

我尊我親。承天之祉。壽名兼美。家國咸喜。公傅秉禮。冊寶有煒。惟千萬祀。令聞不已。

冊寶出門用正安

羽衛有嚴。寶書有輝。昭衍尊名。鋪張上儀。出具端闈。由於康達。比屋延瞻。歌之舞之。

德壽宮冊寶入殿門用正安

南山之鞏。皇壽無窮。太極之尊。皇名是崇。奉茲冊寶。於皇之宮。皇則受之。於昭盛容。

太上皇帝出宮升御座用乾安

降座同

聖明太上。天子有尊。玉坐高拱。慈顏粹溫。震禁嘉承。朝弁眎分。盛禮縟典。邃古未聞。

太傅中書令侍中奉太上皇帝冊寶升殿用聖安
天錫伊嘏。地效其珍。誕作寶典。奉於尊親。爾公爾相。爾

恭爾寅。協舉令儀。適臻厥成。

太傅中書令侍中奉太上皇后冊寶升殿用聖安
坤載有元。乾行是順。施生萬彙。厥德彌盛。翼翼母道。贊我皇訓。相維辟公。奉典斯敬。

皇帝從太上皇后冊寶詣宮中用正安

大矣慈母。德備且純。思古齊敬。佐我皇文。明章茂典。金玉其音。帝親奉之。以翼以欽。

太上皇后出閣升御座用坤安

降座同

天相慈皇。慶臻壺闈。徽柔內修。壽與天齊。既承皇歡。再覲母儀。懿典鴻名。永綏多祺。

內侍舉太上皇后冊寶詣讀冊位用聖安
有美英瑤。於昭祥金。為策為章。並著徽音。德聖而尊。備
舉彌文。億載萬年。永輔堯勛。

御製律呂正義後編卷之一百九

樂章考 宴饗三

宋二

宋紹熙元年恭上壽聖皇太后至尊壽聖皇帝壽成皇后尊號冊寶樂章

按紹熙光宗年號。孝宗三子。孝宗傳位後。光宗恭上尊號。大慶殿發冊寶降殿用正安。中書令侍中奉三宮冊寶詣東階下用禮安。冊寶出門用正安。冊寶入重華宮用正安。至尊壽聖皇帝升座用乾安。降同。太傅中書令奉至尊壽聖皇帝寶升殿用聖安。太傅侍中奉壽聖皇太后冊寶升殿用聖安。太傅中書令侍中奉壽成皇后冊寶升殿用聖安。皇帝從壽聖皇太

后冊寶詣慈福宮用正安。壽聖皇太后出閣升座用坤安。降同。內侍官舉壽聖皇太后冊寶詣讀冊寶位用聖安。皇帝詣壽成殿壽成皇后出閣升座用坤安。降同。內侍官舉壽成皇后冊寶詣讀冊寶位用聖安。凡十四章。章八句。

大慶殿發冊寶降殿用正安

帝受內禪。紀元紹熙。欽崇慈親。孝心肅祇。廼建顯號。廼藏不儀。發冊廣庭。聲歌侑之。

中書令侍中奉三宮冊寶詣東階下用禮安

鐘鼓交作。文物咸備。彤庭玉階。天子是莅。咨爾輔臣。展

采錯事。輔臣稽首。敢不率禮。

冊寶出門用正安

巍巍天宮。洞開闔闔。旗常歲蕤。劍佩雜沓。寶冊啓行。法駕繼發。鑠哉盛典。快覩胥悅。

冊寶入重華宮用正安

仰止皇居。九門載闕。麗日重光。非煙五色。雷動萬乘。雲從百辟。咫尺重霄。鞠躬屏息。

至尊壽聖皇帝升座用乾安

降同

玉璽瑤編。禮容畢具。穆穆至尊。華殿是御。德配有虞。紹唐授禹。於萬斯年。受天之祜。

太傅中書令奉至尊壽聖皇帝冊升殿用聖安
慈皇天臨。睟表怡怡。欽哉聖子。親奉玉卮。鼇抃嵩呼。歡
接華夷。邇臣捧冊。是恪是祗。

太傅侍中奉至尊壽聖皇帝寶升殿用聖安

瑟彼華玉。篆魚鈕龍。與冊並登。咨爾上公。詠以歌詩。協
之鼓鐘。是陟是降。靡有弗恭。

太傅中書令侍中奉壽聖皇太后冊寶升殿用聖

安

天祐皇家。慶集重闈。寶兮揚名。冊兮流徽。金支秀華。盛
容禋威。詔我近弼。相禮不違。

太傅中書令侍中奉壽成皇后冊寶升殿用聖安

大哉乾元。既極形容。坤元德至。實與比隆。寶冊並登。勒
崇垂鴻。相我縟儀。肅肅雍雍。

皇帝從壽聖皇太后冊寶詣慈福宮用正安

涓辰協吉。時維春元。上冊三殿。曠古無前。思齊重闈。積
慶有源。是尊是崇。帝心載虔。

壽聖皇太后出閣升座用坤安

降同

丕赫有宋。三聖授受。誰其助之。翳我太母。東朝受冊。飲
此春酒。聖子神孫。密侍左右。

內侍官舉壽聖皇太后冊寶詣讀冊寶位用聖安

坤德益崇。天壽平格。慶流萬世。子孫千億。刻玉範金。鋪張赫奕。惟昔姜任。則莫我匹。

皇帝詣壽成殿壽成皇后出閣升座用坤安

降同

鞠育保護。母道備矣。密贊親傳。德其至矣。綵服來朝。慈容有喜。既受鴻名。又多受祉。

內侍官舉壽成皇后冊寶詣讀冊寶位用聖安

仰瞻慈闈。登進寶冊。惟時替御。祇率厥職。曰壽曰名。母兮兼得。儷我尊父。億載無極。

紹熙四年加上壽聖皇太后尊號樂章

按四年加上尊號大慶殿發冊寶降殿用正安中

書令侍中奉壽聖皇太后冊寶詣東階下用禮安。

冊寶出門用正安。冊寶入慈福宮殿門用正安。太

傅中書令侍中奉壽聖皇太后冊寶升殿用聖安。

冊寶詣宮中用正安。壽聖皇太后出閣升御座用

坤安。降同。內侍官舉壽聖皇太后冊寶詣讀冊寶

位用聖安。凡八章。章八句。

大慶殿發冊寶降殿用正安

德厚重闡。冲澹粹穆。何以名之。惟慈惟福。寶鏤精鏤。冊鐫華玉。物盛禮崇。丕昭羣目。

中書令侍中奉壽聖皇太后冊寶詣東階下用禮

安

於皇帝室。休運貽孫。重熙疊慶。祇進號榮。爰授茲冊。必躬必親。天子聖孝。萬邦儀刑。

冊寶出門用正安

煌煌冊寶。天子受之。言徐其行。肅展迺儀。其儀維何。劍佩黃麾。鸞駕清蹕。聳瞻九達。

冊寶入慈福宮殿門用正安

熙辰禮備。濟濟雍雍。言奉斯冊。重親之宮。宮帷既敞。協氣感通。皇儀親展。壽祉無窮。

太傅中書令侍中奉壽聖皇太后冊寶升殿用聖

安

既肅琨庭。載升金祀。迺導迺陪。威儀濟濟。天步繼臨。孝誠備矣。聲容孔昭。中外悅喜。

冊寶詣宮中用正安

珞璫彩仗。祇詣慈宮。寶冊前奉。龍挾雲從。言備茲禮。于宮之中。惟天子孝。於昭祲容。

壽聖皇太后出閣升御座用坤安 降同

懿典大冊。陳儀邃深。怡怡愉愉。寶坐是臨。重綵儼侍。采展肅心。三宮協慶。永播徽音。

內侍官舉壽聖皇太后冊寶詣讀冊寶位用聖安

寶冊既奉。祇誦迺言。仁深慶衍。益顯益尊。和聲協氣。充溢乾坤。並受伊嘏。聖子神孫。

慶元二年恭上太皇太后皇太后太上皇帝太上皇后尊號樂章

按慶元寧宗年號。名擴。光宗三子。即位後上尊號。冊寶降殿。冊寶授太傅奉詣東階下。冊寶出門。慈福宮冊寶入門。冊寶升殿。冊寶詣宮中。太皇太后出閣升座。冊寶詣讀冊寶位。太皇太后降座歸閣。壽慈宮冊寶入門。冊寶升殿。冊寶詣宮門。皇太后出閣升座。冊寶詣讀冊寶位。皇太后降座歸閣。以

上史俱闕曲名。壽康宮冊寶入門用正安。太上皇帝升御座用乾安。太上皇帝冊寶升殿用聖安。太上皇后冊寶升殿用聖安。太上皇帝降御座用乾安。冊寶詣宮中用正安。太上皇后出閣升座用坤安。讀冊寶用聖安。太上皇后降座歸閣用坤安。凡二十四章。章八句。

冊寶降殿

天擁帝家。澤流子孫。三宮燕胥。四海崇尊。聲諧韶濩。輝燭瑤琨。維皇緝熙。耀德乾坤。

冊寶授太傅奉詣東階下

御製律呂正統編卷之六
祖后重壽。親闈並崇。駢慶聯休。申景鋪鴻。疊壁交輝。多
儀煥藜。億萬斯年。福祿攸同。

冊寶出門

太任媚姜。塗山翼禹。慈祥曼衍。鴻儀迭舉。寶章奕奕。授
宮僕僕。帝用將之。于彼宮所。

慈福宮冊寶入門

東朝層邃。端闈靖深。列仗節鑾。鏤玉繩金。來奉來崇。載
祇載欽。曾孫之慶。世世徽音。

冊寶升殿

純祐我宋。母儀四朝。擁翼孫謀。如虞承堯。仁覃函夏。喜

浮慶霄。福祿萬年。金玉孔昭。

冊寶詣宮中

神人和懌。天日淑清。王母來燕。必壽而名。珉庭璈音。五
雲佩聲。勉勉我皇。遒昭厥成。

太皇太后出閣升座

曾孫致養。五福駢臻。太極所運。兩儀三辰。輝光日新。啓
佑後人。永翼瑤圖。億萬堯春。

冊寶詣讀冊寶位

徽光宣華。仁聲流文。曠儀合沓。太和氤氲。慈顏有喜。祚
我聖君。珠宮含飴。坐閱來雲。

太皇太后降座歸閣

縟儀既登。寶冊既膺。喜洽祥流。川媚雲烝。天子萬年。鳴玉慈庭。惠我無疆。詵詵繩繩。

壽慈宮冊寶入門

新庭靖安。祖后燕怡。有開聖謀。累崇天基。典章文明。聲容葳蕤。御于邦家。曰壽曰慈。

冊寶升殿

三禮崇容。八鑾警衛。有來辰儀。闡徽媯汭。璇宮肅雍。滌景澄霽。文子文孫。本支百世。

冊寶詣宮門

堯門疊瑞。妣幄齊輝。重坤靖夷。麗冊華徽。天子仁聖。禮文弗違。福壽康寧。同燕層闈。

皇太后出閣升座

文母曼壽。載錫之光。總集瑞命。宜君宜王。惠以仁顯。慈以德彰。保佑子孫。受福無疆。

冊寶詣讀冊寶位

華鸞編玉。文螭掖金。頌德摛英。揚徽嗣音。紫幄天開。翠華日臨。歲歲年年。如周太任。

皇太后降座歸閣

案自冊寶降殿至此十五章。史闕曲名。

御製律呂正統後 卷之九 九
宋有明德。天保佑之。以壽繼壽。以慈廣慈。聲文宣昭。福祉茂綏。神孫之休。燕及華夷。

壽康宮冊寶入門用正安

大安耽耽。興慶崇崇。維皇之尊。與天比隆。非心間燕。文命延鴻。欲報之恩。禮縟儀豐。

太上皇帝升御座用乾安

上帝有赫。百靈效祥。儲祉垂恩。錫年隆康。皇儀晬溫。帝躬肅莊。三宮齊懽。地久天長。

太上皇帝冊寶升殿用聖安

夏典稽瑞。禹玉含淳。追琢有章。溫潤孔純。聖底于安。壽

綿于仁。太上立德。自天其申。

太上皇后冊寶升殿用聖安

父尊母親。天涵地育。燕我翼子。景命有僕。得名得壽。如金如玉。子孫千億。成其厚福。

太上皇帝降御座用乾安

天地清寧。日月華光。歸尊慈極。嵩呼未央。慶函百嘉。壽躋八荒。上皇萬歲。俾熾俾昌。

冊寶詣宮中用正安

晨趨慈幄。佳氣鬱葱。受帝之祉。配天其崇。璧華金精。禮數樂充。天子是若。懽聲融融。

太上皇后出閣升座用坤安
文物流彩。鑾輅靖陳。龜瑞薦祉。坤儀效珍。比皇之壽。翼
帝以仁。和氣致祥。與物為春。

讀冊寶用聖安

黼黻其文。金玉其相。永壽於萬。合德無疆。福緒祥源。厥
後克昌。天維格斯。祚我聖皇。

太上皇后降座歸閣用坤安

榮懷之慶。莫盛於斯。三宮四冊。五葉一時。德阜而豐。福
大而滋。子子孫孫。于時保之。

嘉泰二年恭上太皇太后尊號樂章

按嘉泰亦光宗年號。太皇太后前已於慶元時上
尊號矣。而茲復上尊號者。蓋尊崇之意。每有加無
已也。冊寶降殿。冊寶詣東階。冊寶出門。壽慈宮冊
寶入門。冊寶升殿。冊寶詣宮中。太皇太后升御座。
降同。冊寶詣讀冊寶位。凡八章。章八句。其曲名。史
闕。

冊寶降殿

思齊太任。嬪于周京。至哉坤元。萬物資生。不可儀測。矧
可強名。鏤玉繩金。昭哉號榮。

冊寶詣東階

鼓鐘煌煌。儀物載陳。儀物陳矣。爛其瑤琨。咨爾上公。相
予文孫。勿亟勿徐。奉我重親。

冊寶出門

蕩蕩天門。金鋪玉戶。采旄翠旌。流蕪葆羽。千官影從。迺
導迺輔。都人縱觀。填道呼舞。

壽慈宮冊寶入宮

煌煌寶書。玉篆金鏤。曷爲來哉。自天子所。自天子所。以
燕父母。婉嬪祥雲。日當正午。

冊寶升殿

文物備矣。王事其承。崇牙高張。樂充宮庭。耽耽廣殿。左

城右平。敬爾威儀。攝齊以登。

冊寶詣宮中

維壽伊何。聖德日新。維慈伊何。佑于後人。迺范斯金。迺
鏤斯珉。皇舉玉趾。從於堯門。

太皇太后升御座

降同

侍中版奏。辨外巖中。出自玉房。禕褕被躬。我龍受之。稜
威盛容。皇帝聖孝。其樂融融。

冊寶詣讀冊寶位

案以上八章。曲名闕。

麟趾裏蹄。我寶斯刻。磬礪采緻。載備斯冊。眉壽萬年。詒

謀燕翼於赫湯孫。克綿永福。

紹定三年壽明仁福慈睿皇太后冊寶樂章

按紹定理宗年號。寧宗崩。無子。史彌遠與楊后矯詔立沂王繼子貴誠。更名昀。昀太祖十世孫德昭後也。此所云皇太后者。殆即楊后歟。文德殿冊寶降殿。冊寶詣東階。冊寶出門。慈明殿冊寶入門。冊寶升殿。冊寶詣宮中。皇太后升御座。冊寶詣讀冊寶位。皇太后降御座。凡九章。章八句。其曲名。史闕。文德殿冊寶降殿。思齊聖母。媿於周任。體乾履坤。博厚洪深。七表既啓。萬壽自今。圻庭發號。式昭德音。

冊寶詣東階

煌煌儀物。繹繹鼓鐘。奉茲寶冊。至于階東。上公相儀。列辟盡恭。拜手慈宸。福如華嵩。

冊寶出門

帝闕肅開。天階坦履。霓旌羽蓋。導儀護衛。匪誇雕琢。匪矜繁麗。茲謂盛儀。億載千歲。

慈明殿冊寶入門

金堅玉純。文郁禮縟。來從帝所。作瑞王國。天開地闢。日熙春燠。茲謂盛事。永燕第祿。

冊寶升殿

皇儀有煒。采舁次升。沈沈邃殿。穆穆天廷。坤德采隆。皇圖永寧。咨爾廷臣。攝齊以登。

冊寶詣宮中

壽爲福。先明燭物表。仁沾動植。福齊穹昊。曰慈與睿。並崇丕號。演而申之。萬世永保。

皇太后升御座

適臣跪奏。嚴辦必恭。乃御禕褕。升于殿中。慈顏雍睦。和氣冲融。芳流青史。傳之無窮。

冊寶詣讀冊寶位

徽音孔昭。寶傳斯刻。金昭玉粹。有暱斯冊。載祈載祝。以燕以翼。寶之萬年。與宋無極。

皇太后降御座

案以上九章曲各闕。

皇文旣舉。慶禮告虔。肇自宮闈。格于幅員。子稱母壽。母謂子賢。陟降在茲。隆名際天。

哲宗發皇后冊寶樂章

按妻者。齊也。一與之齊。終身不改。况正名定分。春秋之義。左氏傳春秋。必發端於惠公元妃。所謂閨門之內。萬化從出也。昏義云。尊於朝聘。和於射鄉。

故冊立皇后樂章亦當次於朝會燕饗之後禮之大體其在斯乎皇帝升座用乾安降座用乾安太尉等奉冊寶出入用正安凡三章章八句

皇帝升座用乾安

既登乃依如日之升有嚴有翼不顯丕承天作之合家邦其興朱芾斯皇子孫繩繩

降座用乾安

我禮嘉成我駕言旋降座而蹕奏鼓淵淵景命有僕保祐自天永錫祚嗣何千萬年

太尉等奉冊寶出入用正安

宣哲維公就位肅莊冊寶具舉不顯其光出入宸闈鼓鐘嗶嗶母儀天下萬壽無疆

紹興十三年發皇后冊寶樂章

按紹興高宗年號也其發皇后冊寶樂章皇帝升座用乾安使副入門用正安冊寶出門用正安皇帝降座用乾安皇后出閣用乾安冊寶入門用正安皇后降殿用承安皇后受冊寶用成安皇后升座用和安內命婦入門用惠安外命婦入門用成安皇后降座用徽安皇后歸閣用泰安凡十三章章八句

皇帝升座用乾安

天地奠位。乾坤以分。夫婦有別。父子相親。聖王之治。禮重婚姻。端冕從事。是正大倫。

使副入門用正安

天子當陽。羣工就列。冊寶既陳。鐘鼓備設。上公奉事。容莊心協。克相盛禮。光昭玉牒。

冊寶出門用正安

穆穆眸容。如天之臨。赫赫明命。如玉之音。虔恭出門。禮容兢兢。塗山生啟。夏道以興。

皇帝降座用乾安

朝陽已升。薰風習至。樂奏既成。禮容亦備。玉佩鏘鳴。帝徐舉趾。壺政穆宣。以聽內治。

皇后出閣用乾安

猗歟賢后。德本性成。承天致順。遡日為明。作配儷極。王化以行。萬有千歲。奉祀宗祊。

冊寶入門用正安

欵承祗事。時惟肅雍。跪奉冊寶。陳于法宮。以俯以仰。有儀有容。明神介之。福祿來崇。

皇后降殿用承安

溫惠之德。禕翟之衣。行中采齊。禮無或違。降于丹陛。有

容有儀。委委蛇蛇。誰其似之。

皇后受冊寶用成安

鏤蒼玉兮。盛德載揚。鑄南金兮。作鎮椒房。虔受賜兮。有燭有光。宜室家兮。朱芾斯皇。

皇后升座用和安

禮既行兮。厥位孔安。母儀正兮。容止可觀。奉東朝兮。常得其歡。求淑女兮。豈樂多般。

內命婦入門用惠安

素月澄輝。衆星顯列。炳為天文。各有攸別。椒房既正。陰教斯設。關雎麟趾。應如響捷。

外命婦入門用成安

窈窕其容。淑嫿其姿。爛其如雲。瞻我母儀。曰天之妹。作合惟宜。粲然舞抃。疇不肅祇。

皇后降座用徽安

寶宇煌煌。冊書粲粲。副笄加飾。禕褕有爛。祇若帝休。委蛇樂衍。億萬斯年。永膺宸翰。

皇后歸閣用泰安

太任徽音。太姒是嗣。則百斯男。周室以熾。天子萬年。受茲女士。如妣事任。從以孫子。

淳熙三年發皇后冊寶樂章

按淳熙孝宗年號其發皇后冊寶樂章。皇帝升座用乾安。冊寶入門用正安。冊寶出門用正安。皇帝降座用乾安。皇后出閣用坤安。冊寶入門用宜安。皇后降殿用承安。皇后受冊寶用成安。皇后升座用和安。內命婦入門用惠安。外命婦入門用咸安。皇后降座用徽安。皇后歸閣用泰安。凡十三章。

八句。

皇帝升座用乾安

赫赫惟皇如日之光。肅肅惟后如月之常。禮行一時。明照無疆。天子莅止。疇敢不莊。

冊寶入門用正安

卜月惟良。練辰斯臧。臣工在庭。劍佩瑤瑤。來汝凝承。明命是將。有淑其儀。無或怠遑。

冊寶出門用正安

刻簡以珉。鑄寶以金。持節伊誰。時惟四隣。自我文德。達之穆清。委蛇委蛇。往迄于成。

皇帝降座用乾安

冊行何曩。于門東偏。禮備樂成。合扇鳴鞭。皇舉玉趾。如天之旋。燕及家邦。億萬斯年。

皇后出閣用坤安

御製律呂正統後
卷五
椒塗蘭馭。河潤山容。副笄在首。禕衣被躬。靜女其姝。實翼實從。自彼西閭。聿來殿中。

冊寶入門用宜安

德隆位尊。禮厚文縟。乃篆斯金。乃鏤斯玉。羣公盈門。執事有肅。願言保之。永鎮坤軸。

皇后降殿用承安

規殿沉沉。叶氣收收。明章婦順。表正人倫。躡于左城。暨于中庭。尚宮顯相。罔有弗欽。

皇后受冊寶用成安

備物典冊。樂之鼓鐘。拜而受之。極其肅雍。司言司寶。各

以職從。行地有慶。與天無窮。

皇后升座用和安

容典既膺。壺儀既正。羽衛外列。揚顏中映。如帝如天。以莊以靚。六宮承式。二南流詠。

內命婦入門用惠安

葛覃節用。樛木逮下。形爲嬪則。夙已心化。茲臨長秋。遂正諸夏。以慶以祈。百祥來迓。

外命婦入門用咸安

碩人其頤。公侯之妻。翟茀以朝。象服是宜。如星之芒。遡月之輝。母儀既瞻。羣心則夷。

皇后降座用徽安

窈窕淑女。備六服兮。陟降多儀。聳羣目兮。內治允備。陰教肅兮。宜君宜王。綏有福兮。

皇后歸閣用泰安

天監有周。是生太任。亦有太姒。嗣其徽音。孰如兩宮。慈愛相承。思齊之盛。復見於今。

淳熙十六年皇后冊寶樂章

按淳熙孝宗年號。其皇后冊寶樂章。皇帝升座用乾安。冊寶入門用正安。冊寶出門用正安。皇帝降座用乾安。穆清殿受冊寶。皇后出閣用坤安。冊寶

入門用宜安。皇后降殿用承安。皇后受冊寶用成安。皇后升座用和安。內命婦入門用惠安。外命婦入門用咸安。皇后降座用徽安。皇后歸閣用泰安。凡十三章。章八句。

皇帝升座用乾安

乾位既正。坤斯順承。日麗于天。月斯遡明。惟帝受命。惟帝並登。黼辰尊臨。典冊是行。

冊寶入門用正安

迺協良辰。維春之宜。迺詔近弼。來汝相儀。九門洞開。文物華輝。聲詩載歌。于以侑之。

冊寶出門用正安

有璽範金。有冊鏤瓊。汝使汝介。持節以行。禮始文德。達于穆清。是恪是虔。依我和聲。

皇帝降座用乾安

鼓鐘喤喤。磬筦鏘鏘。劍佩充庭。濟濟洋洋。禮典告備。皇心樂康。於萬斯年。受福無疆。

穆清殿受冊寶皇后出閣用坤安

懿範柔容。如月斯輝。駕厥翟輅。被以禕衣。九御從之。如雲祁祁。典冊是承。心焉肅祇。

冊寶入門用宜安

華棖璧璫。有馨椒殿。備物來陳。多儀式煥。曰冊曰寶。是刻是瑑。並舉以行。皇矣懿典。

皇后降殿用承安

禕褕盛服。有恪其容。是陟是降。相以尙宮。金殿玉階。聿采于中。展詩應律。載詠肅雍。

皇后受冊寶用成安

帝有顯命。稟于親慈。后德克承。拜而受之。人倫既正。王化是基。億載萬年。永祚坤儀。

皇后升座用和安

帝慶三宮。膺受寶冊。御于中闈。載欣載暢。迺孚陰教。迺

明內則翼翼魚貫罔不承式。

內命婦入門用惠安

掖庭頌官于位有四。嚳彼小星。撫以德惠。熙焉如春。育焉如地。慶禮聿成。靡弗咸喜。

外命婦入門用咸安

魚軒鼎來。象服是宜。班于內庭。率禮惟祇。化以婦道。時惟母儀。是慶是類。于胥樂兮。

皇后降座用徽安

正位長秋。容典備矣。王假有家。人倫至矣。儷極倪天。多受祉矣。螽斯蟄螽。宜孫子矣。

皇后歸閣用泰安

維天佑宋。盛事相仍。崇號三宮。甫茲浹辰。肇正中闈。緝禮載陳。邦家之慶。曠古無倫。

又皇后冊寶樂章

按宋史載此樂章。不著何朝。不著何禮。玩其文義。殆亦發皇后冊寶也。皇帝升座用乾安。使副入門用正安。冊寶出門用正安。皇帝降座用乾安。皇后出閣用坤安。冊寶入門用正安。皇后降殿用承安。皇后受冊寶用成安。皇后升座用和安。內命婦入門用惠安。外命婦入門用咸安。皇后降座用和安。

皇后歸閣用泰安。凡十二章。章八句。

皇帝升座用乾安

乾健坤順。羣生首資。日常月升。四時叶熙。帝嗣天歷。后
崇母儀。黼黻承暉。王化是基。

使副入門用正安

燦闕螭蛸。璧門雲龍。烈文維輔。翊奉有容。典章輝朗。彝
度肅雍。歲時縟儀。登于璿宮。

冊寶出門用正安

金晶麗輝。璧葉含春。贊夏之翼。繹虞之嬪。樂序韶亮。禮
文藻新。辟公相成。物采彬彬。

皇帝降座用乾安

帟旒雲舒。金秀充庭。璇衛鑿華。舊佩垂經。皇容熙備。柔
儀順承。三宮齊懽。萬福昭膺。

皇后出閣用坤安

駮翟崇容。禕鞠陳衣。戾止蘭殿。夙興椒闈。淑正宣華。粹
明騰輝。欽若有承。嗣音之徽。

冊寶入門用宜安

禕奕流光。沙祥增衍。編玉鏤德。螭金溢篆。粹猷藻黻。徽
文華顯。二南聲詩。于時昭闡。

皇后降殿用承安

翬珩煥采。趨節風韶。陟降城陛。奉將英瑤。辟道承薰。嬪儀揚翹。是敬是祇。德音孔昭。

皇后受冊寶用成安

帝奉太室。后儀成之。帝養三宮。后志承之。德如關雎。盛如螽斯。宜君宜王。百世本支。

皇后升座用和安

肅肅壺彝。雍雍陰教。險詖自防。警戒是做。中闈端委。列御胥告。其思輔順。永翼帝孝。

內命婦入門用惠安

天子九嬪。王宮六寢。有燭令儀。載秩華品。福履綏將。節

用躬儉。矢其德音。于以來諗。

外命婦入門用咸安

象服之文。鵲巢之風。化以婦道。覲于內宮。采蘋澗濱。采藻澗中。夙夜在公。贊彼累功。

皇后降座用和安

光佑晏寧。惠慈燕喜。壽仁並崇。家邦均祉。懿文交舉。壺冊嗣美。維億萬年。愛敬惟似。

皇后歸閣用泰安

天心仁佑。坤德世昭。灼有慈範。著于累朝。儉以贊虞。勤以承堯。是用則倣。共勵夙宵。

嘉泰三年皇后冊寶樂章

案嘉泰寧宗年號其皇后冊寶樂章皇帝升座用坤安使副入門用正安冊寶出門用正安皇帝降座用乾安皇后出閣用乾安冊寶入門用宜安皇后降殿用承安皇后受冊寶用成安皇后升座用和安內命婦入門用惠安外命婦入門用咸安皇后降座用徽安皇后歸閣用泰安凡十三章章八句。

皇帝升座用坤安

茂建坤極容典聿新天命所贊慈訓是遵肅涓穀旦躬

御紫宸鴻禧累洽駢賚翕臻

使副入門用正安

端門曉闕瑞氣雲凝有儼良輔踵武造廷肅肅王命是將是承登冊穆清萬歲永膺

冊寶出門用正安

瑤冊玉寶爛然瑞輝旁翼絳節上承紫微璆鳴朝佩徐出獸扉登進坤極益彰典徽

皇帝降座用乾安

天臨黼辰雲集弁纓金石遞奏典禮備成玉趾緩步龍駕翼行言旋北極永燕西清

皇后出閣用乾安

日薰椒屋。雲靄璧門。有華瑞節。來自帝闈。統天惟乾。合德者坤。我龍受之。福祿永繁。

冊寶入門用宜安

虹輝燦爛。雲篆綢繆。絳節前導。瑞光上浮。瑤階玉扉。旣集長秋。欽承天寵。永荷帝休。

皇后降殿用承安

瑤殿清閔。玉城坦夷。禕衣副珈。陟降不遲。寶冊聿至。載肅載祇。禮儀昭備。福履永綏。

皇后受冊寶用成安

日月臨燭。乾坤覆持。明並二曜。德合兩儀。光婉宸極。共恢化基。膺受茂典。億載永宜。

皇后升座用和安

寶璽瑤冊。旣祇旣承。繡裯藻席。載躋載升。柔儀肅穆。瑞命端凝。永膺多福。如川方增。

內命婦入門用惠安

服煥盛儀。班分華綴。九嬪婦職。六寢內治。參差苻菜。求勤寤寐。烝然來思。相禮贊祭。

外命婦入門用咸安

婦榮於室。通籍禁中。班列有次。車服有容。佐我關雎。鵲

巢之風。被之僮僮。曷不肅雍。

皇后降座用徽安

金石具舉。典禮茂明。淑慎其止。適觀厥成。瓊琚微動。鳳輦翼行。儀光婉極。德邁嬪京。

皇后歸閣用泰安

寶座既興。鳳輿戒行。奏解嚴辦。歸燕遂清。問安壽慈。奉盥宗祊。彌千萬年。內助聖明。

嘉定十五年皇帝受膺天命之寶樂章

案嘉定寧宗年號考傳國璽方四寸秦始皇命李斯篆孫壽刻其文曰受命于天既壽永昌子嬰奉

其璽降漢高祖即位服之世因謂之傳國璽厥後

王莽使王舞迫太后求之出璽投地螭角微玷繼

歸光武獻帝時董卓亂掌璽者投於井孫堅於井

得之徐璆以送獻帝尋以禪魏魏以禪晉五胡亂

華爲劉石所得後復歸之東晉歷宋齊梁陳以至

隋隋亡蕭后携之入突厥唐太宗求之不得乃自

刻玉曰皇帝景命有德者昌貞觀四年蕭后始自

突厥奉璽歸唐朱溫篡璽入於梁梁入後唐廢帝

自焚自是璽不知所在矣此云受膺天命之寶殆

亦自刻其寶也然寧宗時河山半壁侂冑作奸金

巢之風。被之僮僮。曷不肅雍。

皇后降座用徽安

金石具舉。典禮茂明。淑慎其止。適觀厥成。瓊琚微動。鳳輦翼行。儀光婉極。德邁嬪京。

皇后歸閣用泰安

寶座既興。鳳輿戒行。奏解嚴辦。歸燕遂清。問安壽慈。奉齋宗祊。彌千萬年。內助聖明。

嘉定十五年皇帝受膺天命之寶樂章

案嘉定寧宗年號考傳國璽方四寸秦始皇命李斯篆孫壽刻其文曰受命于天既壽永昌子嬰奉

其璽降漢高祖即位服之世因謂之傳國璽厥後王莽使王舞迫太后求之出璽投地螭角微玷繼歸光武獻帝時董卓亂掌璽者投於井孫堅於井得之徐璆以送獻帝尋以禪魏魏以禪晉五胡亂華為劉石所得後復歸之東晉歷宋齊梁陳以至隋隋亡蕭后携之入突厥唐太宗求之不得乃自刻玉曰皇帝景命有德者昌貞觀四年蕭后始自突厥奉璽歸唐朱溫篡璽入於梁梁入後唐廢帝自焚自是璽不知所在矣此云受膺天命之寶殆亦自刻其寶也然寧宗時河山半壁侂胄作奸金

兵分道南侵。此何時乎。而猶以膺受璽寶。粉飾太平。亦多見其華而不實也。其樂章恭膺天命之曲。太蔟宮。舊疆來歸之曲。太蔟宮。永清四海之曲。太蔟宮。凡三章。章八句。

恭膺天命之曲太蔟宮

我祖受命。恭膺于天。爰作玉寶。載祇載虔。申錫無疆。神聖有傳。昭茲興運。於萬斯年。

舊疆來歸之曲太蔟宮

於穆我皇。之德之純。涵濡羣生。矧我遺民。連齊跨晉。輸貢效珍。土宇日闢。一視同仁。

永清四海之曲太蔟宮

我祖我宗。德厚澤深。於皇繼序。益單厥心。天人協扶。一統有臨。乾坤清夷。振古斯今。

至道元年冊皇太子樂章

按至道。太宗年號。時寇準請建儲。曰。謀及婦人中。官不可。謀及近臣不可。惟陛下自擇耳。上曰。壽王可乎。準曰。知子莫若父。聖慮既已為可。願即決矣。因立壽王為太子。謁廟還。京師擁道喜曰。少年天子也。上語寇準曰。人心遽屬太子。置我何地。準賀曰。此社稷福也。此樂章。殆即冊立壽王所用歟。太

子出入用正安。羣臣稱賀用正安。凡二章。章八句。
太子出入用正安。

主鬯之重。尤屬賢明。承華肇啟。上嗣騰英。禮修樂舉。育德開榮。一人元良。萬邦以寧。

羣臣稱賀用正安

皇儲既建。聖祚無疆。鸞旌列叙。雞戟分行。前星有爛。瑞日重光。際天接聖。溫文允臧。

天禧三年冊皇太子樂章

案天禧真宗年號。太子出入用明安。一章。章八句。明離之象。少陽之位。固邦為本。體天作貳。儀範堯溫。禮

章斯備。丕宣令猷。恭守宗器。

乾道元年冊皇太子樂章

案乾道孝宗年號。其冊皇太子樂章。皇帝升座用乾安。太子入門用明安。太子出門用明安。皇帝降座用乾安。凡四章。章八句。

皇帝升座用乾安

宋受天命。垂緒無疆。惟懷永圖。乃登元良。涓選休辰。冊書是將。黼坐天臨。穆穆皇皇。

太子入門用明安

於維皇儲。玉潤金聲。體震之游。重離之明。冊寶具舉。環

佩鏘鳴。守器承祧。惟邦之榮。

太子出門用明安

樂備既奏。和聲冲融。玉簡金書。翔鸞戲鴻。下拜登受。旋於青宮。儀辰作貳。垂休無窮。

皇帝降座用乾安

我禮備成。我駕言旋。降座而蹕。奏鼓淵淵。國本既定。保佑自天。克昌厥後。何千萬年。

乾道七年冊皇太子樂章

元年既冊皇太子。七年復冊之者。蓋皇太子即光宗。係孝宗三子。前所冊立。或不永其年。故有更歟。

案樂章首句云。建儲以賢。或有易樹子之舉歟。皇帝升座用乾安。太子入門用明安。太子出門用明安。皇帝降座用乾安。凡四章。章八句。

皇帝升座用乾安

建儲以賢。闢宮於東。典策既備。筮占既從。濟濟鄉士。鏘鏘鼓鐘。天子戾止。盛哉禮容。

太子入門用明安

珣珉嗟嗟。篆金煌煌。對揚于庭。是承是將。星重其輝。日重其光。觀瞻以懌。國有元良。

太子出門用明安

淵中象德。玉裕凝姿。進退周旋。有肅其儀。既定國本。益隆慶基。燕及兩宮。福祿如茨。

皇帝降座用乾安

儲副豫定。器之公兮。冊授孔時。禮之隆兮。天步遲遲。旋九重兮。流祉萬年。德無窮兮。

嘉定二年冊皇太子樂章

按嘉定寧宗年號。寧宗崩。無子。因立沂王繼子貴誠。更名昀。是為理宗。此所云冊皇太子者。抑不知何所指歟。皇帝升座。太子入門受冊寶。太子受冊寶出門。皇帝降座。凡四章。章八句。其曲名史闕。

皇帝升座

於皇我宋。受命于天。升儲主鬯。衍慶卜年。典冊告備。庭工載虔。萬乘蒞止。端冕邃延。

太子入門受冊寶

太極端御。少陽肅祇。珉簡斯鏤。袞服孔宜。式奏備樂。迺陳盛儀。下拜登受。永言保之。

太子受冊寶出門

明兩承曜。作貳宣猷。茂德金昭。令譽川流。豫定厥本。永詒乃謀。三朝致養。問寢龍樓。

皇帝降座

御製律呂正統後
卷五
三
震洊體象。我儲明兮。渙揚顯冊。我禮成兮。大駕言旋。警蹕鳴兮。燕祉無疆。邦之榮兮。

寶祐二年皇子冠樂章

按內則曰。男子二十而冠。始學禮。郊特牲曰。適子冠於阼。以著代也。醮於客位。加有成也。三加彌尊。踰其志也。冠而字之。敬其名也。家語孟懿子曰。始冠必加緇布之冠。何也。孔子曰。示不忘古也。然則天下無生而貴者。雖皇太子。必始加緇布冠。次加皮弁。次加爵弁。可知矣。其樂章。皇帝將出文德殿。用隆安。賓贊入門用祇安。賓贊出門用祇安。皇帝

降座用隆安。皇子初行。賓贊入門。皇子詣受制位。皇子升東階。皇子升筵。初加。初醮。再冠。再醮。三加。三醮。皇子降。朝謁。皇帝將出。皇子再拜。皇子退。皇帝降座。凡二十章。章八句。自皇子初行至皇帝降座。十六章。曲名闕。

皇帝將出文德殿用隆安

於皇帝德。乃聖乃神。本支百世。立愛惟親。敬共冠事。以明人倫。承天右序。休命用申。

賓贊入門用祇安

豐芑詒謀。建爾元子。揆禮儀年。筮賓敬事。八音克諧。嘉

賓至止于以冠之。成其福履。

賓贊出門用祇安

禮國之本。冠禮之始。賓升自西。維賓之位。于著于阼。維子之義。厥惟欽哉。敬以從事。

皇帝降座用隆安

路寢闢門。黼座恭已。羣公在庭。所重維禮。正心齊家。以燕翼子。於萬斯年。王心載喜。

皇子初行

按自此至末章。曲名闕。

有來振振。月重輪兮。瑜玉在佩。綦組明矣。左徵右羽。德

結旌矣。步中采齊。矩護循兮。

賓贊入門

我有嘉賓。直大以方。亦既至止。厥德用光。冠而宇之。厥義孔彰。表裏純備。黃耆無疆。

皇子詣受制位

吉圭休成。其日南至。天子有詔。冠爾皇嗣。爲國之本。隆邦之禮。拜而受之。式共敬止。

皇子升東階

茲惟阼階。厥義有在。歷階而升。敬謹將冠。經訓昭昭。邦儀粲粲。正纚賓筵。壽考未艾。

皇子升筵

秩秩賓筵。籩豆孔嘉。帝子至止。衿纓振華。周旋陟降。禮行三加。成人有德。匪驕匪奢。

初加

帝子維賢。懋昭厥德。跪冠于房。元冠有特。鼓鐘嗶嗶。威儀抑抑。百禮既洽。祚我王國。

初醮

有賓在筵。有尊在戶。磬管將將。醮禮時舉。跪觴祝辭。以永燕譽。寶祚萬年。磐石鞏固。

再冠

復及肇祥。震維標德。乃共皮弁。其儀不忒。體正色齊。維民之則。璇霄眷佑。國壽箕翼。

再醮

冠醮之義。匪酬匪酌。于戶之西。敷共以恪。金石相宣。冠醮相錯。帝祉之受。施及家國。

三加

善頌善禱。三加彌尊。爵弁戔戔。介珪温温。陽德方長。成德允存。燕及君親。厥祉孔蕃。

三醮

席于賓階。禮義以興。受爵執爵。多福以膺。匪惟服加。德

御製律呂正義 編 卷一
加愈并。匪惟德加。壽加愈增。

皇子降

命服煌煌。跬步中度。慶輯皇闈。化行海宇。禮具樂成。惕若戒懼。寶璐厥躬。有秩斯祐。

朝謁皇帝將出

皇王烝哉。令聞不已。燕翼有謀。冠醮有禮。百僚在庭。適相厥事。頌聲所同。嘉受帝祉。

皇子再拜

青社分封。前星啟燄。繁弱綏章。厥光莫揜。容稱其德。蓄學之驗。芳譽敷華。大主無玷。

皇子退

元袞黼裳。垂徽永世。勉勉成德。是在元子。胙土南賓。厥旨孔懿。充一忠字。作百無愧。

皇帝降座

愛始於親。聖盡倫兮。元子冠字。邦禮成兮。天步舒徐。皇心寧兮。家人之吉。億萬春兮。

淳化鄉飲酒樂章

按鄉飲酒義曰。工入。升歌三終。主人獻之。笙入三終。主人獻之。間歌三終。合樂三終。工告樂備。遂出。升歌三終者。工入升堂。鼓瑟而歌。鹿鳴四牡皇華。

每篇爲一終也。笙入三終者。笙入堂下。磬南北面立。奏南陔白華華黍。亦一篇而一終也。間歌三終者。堂上歌魚麗。堂下笙由庚。此爲一終。堂上歌嘉魚。堂下笙崇邱。此爲二終。堂上歌南山有臺。堂下笙由儀。此爲三終也。合樂三終者。工歌關雎。則笙吹鵲巢合之。工歌葛覃。則笙吹采芣合之。工歌卷耳。則笙吹采蘋合之。如此三終。工告樂備。此淳化鄉飲樂章。惟擬鹿鳴南陔嘉魚崇邱關雎鵲巢等詩者。蓋古樂旣亡。曹孟德平劉表。得鹿鳴騶虞伐檀文王四篇。後又失其二。惟鹿鳴一篇。每正旦大會用之。至晉而鹿鳴一篇又無傳矣。况歷唐至宋淳化時乎。此其節奏。亦依稀髣髴間耳。凡三十三章。

鹿鳴呦呦。命侶與儔。宴樂嘉賓。旣獻且醕。獻醕有序。休祉無疆。展矣君子。邦家之光。

鹿鳴呦呦。在彼中林。宴樂嘉賓。式昭德音。德音愔愔。旣樂且湛。允矣君子。實慰我心。

鹿鳴呦呦。在彼高岡。宴樂嘉賓。吹笙鼓簧。幣帛戔戔。禮儀踟踟。樂只君子。利用賓王。

鹿鳴相呼。聚澤之蒲。我樂嘉賓。鼓瑟吹竽。我命旨酒。以

御製律呂正統編 卷五
燕以娛。何以贈之。元纁粲如。

鹿鳴相邀。聚場之苗。我美嘉賓。令名孔昭。我命旨酒。以歌以謠。何以置之。大君之朝。

鹿鳴相應。聚山之荆。我燕嘉賓。鼓簧吹笙。我命旨酒。以逢以迎。何以薦之。揚于王庭。

右鹿鳴六章。章八句。

瞻彼南陔。時物嘉良。有泉清泚。有蘭馨香。晨飲是汲。夕膳是嘗。慈顏未悅。我心靡遑。嬉嬉南陔。眷眷慈顏。和氣怡色。奉甘與鮮。事親是宜。事君是思。虔勗忠孝。邦家之基。

右南陔二章。章八句。

洋洋嘉魚。佇以美瓜。君子有道。嘉賓式燕以娛。洋洋嘉魚。佇以芳罍。君子有德。嘉賓式歌且舞。我有宮沼。龜龍擾之。君子有禮。嘉賓式貴表之。我有官藪。麟鳳來思。君子有樂。嘉賓式慰勤思。相彼嘉魚。爰縱之壑。我有旨酒。嘉賓式燕以樂。相彼嘉魚。在漢之梁。我有旨酒。嘉賓式燕以康。森森喬木。美蔓縈之。我有旨酒。嘉賓式燕宜之。啾啾黃鳥。載飛載止。我有旨酒。嘉賓式燕且喜。

右嘉魚八章。章四句。

崇邱峩峩動植斯屬。高既自遂。大亦自足。和風斯扇。膏雨斯沐。我仁如天。以亭以育。

崇邱巍巍動植其依。高大之性。各極爾宜。王道坦坦。皇猷熙熙。仁壽之域。烝民允躋。

右崇邱二章章八句。

關雎于飛。洲渚之湄。自家刑國。樂且有儀。郁郁芳蘭。幽人擷之。温温恭人。哲后求之。求之無斁。寤寐所屬。罄爾一心。受天百祿。郁郁芳蘭。雨露滋滋。温温恭人。圭組縻之。郁郁芳蘭。佩服珍之。温温恭人。福履綏之。

關雎踟踟。集水之央。好求賢輔。同揚德光。蘋蘩芳滋。同誰擷之。願言賢德。靡日不思。偶其賢德。輔成已職。永配玉音。服之無斁。潔其粢盛。中心匪寧。薦於宗廟。助君德馨。賢淑來思。人之表儀。風化天下。何樂如之。

右關雎十章章四句。

彼鵲成巢。爾類攸處。之子有歸。瓊瑤是祖。彼鵲成巢。爾類攸匹。之子有行。錦繡是飾。彼鵲成巢。爾類攸共。之子有從。蘭蓀是奉。伊鵲成巢。珍禽戾止。婉彼佳人。配于君子。

伊鵲營巢。珍禽攸處。內助賢侯。弼于明主。
伊鵲營巢。珍禽輯睦。均養嘉雛。致于蕃育。

右鵲巢六章。章四句。

大觀聞喜宴樂章

按漢制。郡國舉士。大槩有三。一曰賢良方正。二曰孝廉。三曰博士弟子。唐制取士之科。由學館者曰生徒。由州縣者曰鄉貢。皆進於有司而進退之。其科之目。有秀才。有進士。有明法。有明字。有明算。有一史。有三史。有開元禮。有道舉。有童子。此歲舉之常選也。其天子自詔曰。制舉。所以待非常之才焉。

宋之科目。有進士。有明經。熙寧後改取士之法。廢明經而獨用進士。又自漢至唐。進士登第者尚未釋褐。或爲人所薦。或再應皆中。或藩方辟舉。然後得釋褐。至宋則放進士。及第。卽釋褐。此聞喜宴。宴進士也。狀元以下入門用正安。初舉酒。用賓興賢能。再酌。用於樂辟雍。三酌。用樂育英才。四酌。用樂且有儀。五酌。用正安。凡六章。章八句。
狀元以下入門用正安

多士濟濟。于彼西雍。欽肅威儀。亦有斯容。烝然來思。自西自東。天畀爾祿。惟王其崇。

初舉酒用賓興賢能

明明天子。率由舊章。思樂泮水。光于四方。薄采其芹。用賓于王。我有好爵。寘彼周行。

再酌用於樂辟雍

樂只君子。式燕又思。服其命服。攝以威儀。鐘鼓既設。一朝疇之。德音是茂。邦家之基。

三酌用樂育英才

聖謨洋洋。綱紀四方。烝我髦士。觀國之光。遐不作人。而邦其昌。以燕天子。萬壽無疆。

四酌用樂且有儀

我求懿德。烝然來思。邇豆靜嘉。式燕綏之。溫溫其恭。莫不令儀。追琢其章。髦士攸宜。

五酌用正安

思皇多士。揚于王庭。鐘鼓樂之。肅雝和鳴。威儀抑抑。旣安且寧。天子萬壽。永觀厥成。

政和鹿鳴宴樂章

按周禮。大司徒以鄉三物教萬民而賓興之。鄉大夫三年則大比。攷其德行道藝而興賢者能者。鄉老及鄉大夫帥其吏與其衆以禮賓之。厥明。鄉老及鄉大夫羣吏獻賢能之書於王。王再拜受之。呂

御製律呂正統編 卷二
東萊曰。只看賓之一字。當時蓋甚尊之也。鄉舉里選之法。宋雖不行。而此鹿鳴宴樂章。猶得賓興之遺意。故叙燕饗樂章。而以此終焉。蓋關乎教化者。非淺鮮也。初酌酒用正安。再酌用樂育人才。三酌用賢賢好德。四酌用烝我髦士。五酌用利用賓王。凡五章。章八句。

初酌酒用正安

思樂泮水。承流辟雍。思皇多士。賁然來從。雝雝濟濟。四方攸同。登于天府。維王是崇。

再酌用樂育人才

鐘鼓皇皇。磬筦鏘鏘。登降維時。利用賓王。髦士攸宜。邦家之光。媚于天子。事舉言揚。

三酌用賢賢好德

鳴鹿呦呦。載弁依依。烝然來思。旨酒思柔。之子言邁。泮渙爾游。于彼西雍。對揚王休。

四酌用烝我髦士

首善京師。灼于四方。烝我髦士。金玉其相。飲酒樂曲。吹笙鼓簧。勉戒徒御。觀國之光。

五酌用利用賓王

遐不作人。天下喜樂。何以况之。鳶飛魚躍。旣勸之駕。獻

酬交錯。利用賓王。縻以好爵。

